

Inatsisartut oqaaseqaataat

Inatsisartut ataatsimoortut Naalakkersuisunut kaammattuuteqarput pitsaaliunikku, timikkut tarnikkullu inerisaaqqinnissaq nukittorssaaqqinnissarlu siunertaralugu aningaasanut inatsisissamut missingersuusiornerni ukiunut tulliuttunut kulturikkut timersornikkullu anguniakkanut naleqquttumik aningaasaliissuteqartalernissaq siunertaralugu Kalaallit Nunaanni Timersoqatigiiffiit Kattuffiannut saaffiginnissuteqassasut suleqatiserinnissasullu.

Taamatuttaaq inatsisartut ataatsimoortut naalakkersuisunut kaammattuuteqarput 2019-ip ingerlanerani kommunit, susasaqartullu tamaasa peqatigalugit suleqatigalugillu timersornermik ineriartortitsinissaq pillugu isumasioqatigiinnermik aqqissuuseqqullugit.

Isumasioqatigiinnerup siunertarissavaa timersorneq timigissarnerlu pillugit inatsisartut inatsisaannik nr. 15, 6 juni 2016-meersoq pillugu nalilersueqqinneq; inatsit anguniakkanut naleqquppa? Suna aqqitassavaa suna naleqqussagassavaa? Timigissaatigalugu timersortartunut inatsit naleqquppa? Pimoorullugu timersortartunut, nunanullu allanut unammisartoqarnermut inatsit naleqquppa? Anguniakkanut aningaasaliissutigineqartartut naammappat? Sungiusaasoqarneq qangatut ingerlaannassava? Imaappoq nammineq piumassuseq tunngavigalugu ingerlanneqassava? Imalunniit arlaatigut aningaasatigut ajunngitsorsiassaqarsinnaalersinnaaneq anguniarneqassava? Soorlu Islandimi taamatut ingerlatsisoqalereersimasoq.

Isumasioqatigiinnermit innersuussutit timersornermut timigissarnermullu inatsisip ullutsinnut naleqqussarneqarnissaanut Inatsisartunit Naalakkersuisunillu tunngavissatut atorneqarsinnaapput.